

2 Pita

Wimaamala

¹ Tau Simona Pita, Yesu Keliso a tu bagibagi ma a tu wituwetuwega.

Leta geka a gilumiyahi uyahimi taumi ma tau ata Yaubada Yesu Keliso ata Tu wiluyagohana hai dumalu tepahiyei, ani witumagana dewadewana to tutuhagaya.

² Yaubada ma ata Guyau Yesu ona hanapugehi yaka apo hai lunugotootogo ma hai nugodumola hina lata duma uyahimi.

Mae dewadewana a dewa

³ Yaubada a kadidiligei e haguhaguta uyahinei a nugotuhu atapuhi ta wotago imahiyehi Yaubada nugohanahanapuna uyahinei. Babana i otugeta ipa a wasawasa po a dewa dewadewahi ina weleta.

⁴ Tauna a paliwitumagana hi haki duma yaka wipoyahiyei ma hipuli a luhogala apapoehi ta lowo halehi po Yaubada a kamna ta waya.

⁵ Naka binei ma ona wileta kadidili po omi witumagana ona luwitani dewa dewadewana uyahinei, dewa dewadewana u tepana hanapu,

⁶ hanapu u tepana upuhegoya, upuhegoya u tepana towolo momota, towolo momota u tepana Yaubada mamaena,

⁷ ma u tepana labini anani kokoe luhogala.

⁸ Inapa geka dewahi uyahiji ona kadidili yaka apo ata Guyau Yesu Keliso hanapuna uyahimi ina

mewahaga po omi bagibagi po omi luano apegahina tutowolo.

⁹ Ma inapa geka dewahi ega uyahimi hina memae apo taumi galenami mei tu matakakeke, baba omi apapoe odubohi Tu paligilina amaka o winugoguluwi.

¹⁰ Walewalehiu, geka a palipaliwelemi ipa ona wileta kadidili po Yaubada a bolu i inaganata uyahina ona memae ma ega ona memeliya halleya. Inapa u baha geka ona wiponawogogeya yaka apegahina ona peu.

¹¹ Ma houga u nao dumata uyahina apo ina likaohami hougana ona lului ata Guyau Yesu Keliso Tu wiluyagohanita anani taniwaga memewahaganaya uyahina.

¹² Geka ginoulihi amaka o hanapugehi po o wootago pahihi ma tamogi houga magomagouna a inugohepami.

¹³ Ma anai yautuwe hoi hipuli a memae ana inugohepami po dewa dewadewana binei ona iletam.

¹⁴ Matababana gegeka, ata Guyau Yesu Keliso amaka i wiatatiyeu po kikina ma apo yautuwe a nehaleyahoi hipuli.

¹⁵ Yaka a iletam kadidili ipa a hilage ma u muliu u wiatatiyanageka ega nugomi hina guluguluwihi.

Yaubada a baha

¹⁶ Lolowa amaka to paliwelemi ata Guyau Yesu Keliso a nei po a kadidili ubeihi, ma i wipaliwelena naka ega lawa hai widedede uyahinei matayai a wasawasa matiyei to galeya.

¹⁷⁻¹⁸ Hougana oya waiwoiyawana u tepana mitehi to memae ma Yaubada ponana yadei to

noonoli ma i pa, ‘Natuwe geka a luhogalem ma bimgei a kaoha.’ Ma baha geka naka tauna Amana a wasawasa diidiganei i nei, po Yaubada Wotalaagena a kawaiadewadewa po a wiwasawasa Natuna i wele damaneyea.

¹⁹ Tu bahapiko odubohi ponahiyei hi palipali-weleta. Uyahinei tu bahapiko hai baha ona winugonugotuhugena imahiyeya babana hai wibabani galenana mei yayata uguwa u hinena ina lualateya po ina yaayahi ma a sigana ubona malatomtom ina geleta yaka apo u nugenugomi ina yayahi.

²⁰ Geka ginouli baneina yaka ona inugonugotuhu imahi naka ega emoemotata po tunawata Yaubada a bahapiko ta hanapugeya.

²¹ Matababana tu bahapiko ega tauhi hai winugonugotuhugei hita ibaabani ma tamogi Alugo Woiyawa tu bahapiko i inugotuhuhi ma Yaubada a baha hi ibaabaniyehi.

2

Tu wiatatiyana koyakoyama

¹ Tu bahapiko koyakoyama odubohi hi gelegeleta lawa u hayahi, mei geka hougana gasi apo tu wiatatiyana koyakoyama hina geleta u hayami po hina koyamemi hai wiatatiyana apapoenei, po Guyau i gimagimaleta hina bowiyeya, yaka apo hai apapoe mihana hina tuhaga yagiyagineya.

² Tauhi dewa waitepahininhinimayahi uyahihiyei apo lawa magomagouhi hina koyamehi po

hina wotagohi ma tu meuputa hina galehi po hina pa, tu tapalolo hai dewa hi apapoe.

³ Tauhi gapola luhogalana u nugenugohi i lata duma, ma hai baha dagiha uyahinei ipa nugenugomi hina winihi po hina lugapolemi koyama uyahinei. Ma tamogi Yaubada hai ani libahibahi amaka i wononogogeya po e iotonana.

⁴ Yaubada tu winoyanoya mi yadena hai apapoe binei ega ita kawahawenihi yaka i wihulu hopunehi domo uguguwana u hinena po he memae ma libahibahi iyetana he iotonaneya.

⁵ Odubona Yaubada tu meuputa atapuhi ega ita lunugotootogogehi yaka goila hopu uyahina i uni pahihi. Nowa a lawa magouhi 7 mitehi i luyawahih, babana tauna lawa dumadumaluna ma tu wiututululougo.

⁶ Ma dobu apapoehi luwaga i apuhi po hi alahihi naka Sodom ma Gomola, po ipa ta galena tuhaga po dewa apapoehi ega ta dewadewahi.

⁷⁻⁸ Ma dobuhi uyahihi Lota tunawana lawa a dewa dumadumaluna yaka Yaubada i haloya. Lota u hayahi i memae ma hai dewa gobugobuhi po hai wiponahahalena matanei i gagaleya po taniganei i noonoli yaka nugenugona i wiwuwa duma.

⁹ Uyahinei ipa ta hanapugena dumaya Guyau tu dewadewa atapuhi ludadana uyahihiyei apo ina halozi. Ma tu apapoe apo ina panipanihi a sigana libahibahi iyetana ina geleta.

¹⁰ Naka tauhi tu apapoe Yaubada a taniwaga dewadewana hi wihinigigiyea ma dewa apapoe po kamna apapoe he wotagoya, yaka apo maiha apapoe ina welehi.

Tu apapoe ega hita iyateyate ma hi nugogegae yada tu miyena yeuyeuhi uyahihi po he palipalapapoenihi.

¹¹ Tu winoyanoya kadikadidili dumahi Yaubada uyahina he memae ma tamogi yada tu miyena apapoehi ega hita palipaliapapoenihi Guyau u matana.

¹² Tu wiatatiyana koyakoyama dewa apapoen he dewadewaya galenahi mei gamogamo, po hai kamna tunawa he wootagoya ma he nena. Hai winugoneina binei he palipaliguyaguyau yaka apo hai hilage mei gamogamo hai hilage walo uyahina,

¹³ po hai apapoe mihana hina wiyuwa. Matababana lawa u matahi hai luhogala gowagowada anohi hi wogeletehi. Ma apo mitehi on'am gogona yaka apo hina witepahubami hai dewa apapoe ubeihi.

¹⁴ Hai matamaga binei he iholo yababa nae ma dewa apapoen ega hita liwoloeya, ma lawa tu lunugoluwaluwaga dewa apapoen uyahihiyei he titeinihi, ma hi'mboho duma. Naka binei Yaubada i paligubahi.

¹⁵ Dewa dumadumaluna tahayana hi welupaleya ma hi welupowa, po Biyo natuna gowana Balama a dewa hi wotagoya, babana tauna i luhogaleya ipa dewa apapoe uyahinei ma apo ina wigapola.

¹⁶ Doniki Balama i palimatani a dewa buubuwua binei, gamogamona i ibaabani mei lawa hota ina ibaabani po i' baha nae Balama uyahina yaka a dewa apapoehi i wohounihi.

¹⁷ Lawa hai dewa geka pitenana galenahi mei

goila halehaleyana hi po mei gahu togowa e yoyogenaniyehi. Yaka Yaubada apo ina houna hopunehi dobu uguguwana uyahina po hina mewahaga.

¹⁸ Hai dagiha i winugogegehi ma he ibaabani koyakoyama hini luhogalana binei ma tu nugobui wouhi he titeina wiwila mehi hai dewa gobugobuhu uyahihi.

¹⁹ Hai wiatatiyana tu wotagohi uyahahihi hi pa, ‘Geka dewahi hoehoe halenahi.’ Ma tamogi tauhi hai dewa gobugobuhi ubeihi ma he panipani mehi. Uyahinei lawa awai dewa apapoena e dewedewena gawahi tauna e panipani meya.

²⁰ Lolowa tauhi ata Guyau Yesu Keliso Tu wiluyagohanita tuwegana amaka hi nonoli po hi witumaganeya ma dewa apapoehi hi wihinigigiyehi ma inapa hina gunawilena mehi po hai dewa apapoe odubohi hina wimehi yaka hai apapoe tahatahayahi hina gelagonihi.

²¹ Itapa tahaya dumadumaluna ega hita hanapugeya ma apapoe hita wialoni. Ma tamogi tahaya dumadumaluna amaka hi hanapugeya, ma hi nehaleya yaka mae apapoe dumana uyahina apo hi geleta babana lugagayo yeuyeuna hi nehaleya,

²² po hai dewa apapoehi hi dewena mehi po ani galenahi mei kedewa medahi he yam mehi ma polo hinihi ta liyeuyeuh ma hi gunawilena mehi po he laubigabiga meme.

3

Iyeta sigasigana binei

¹ U lawa, u giluma geka wiluwagana a gilumiyahi uyahimi ma u giluma luwagahi uyahihi a wileta po ipa a winugohepami po ona inugonugotuhu imahi.

² Tu bahapiko waiwoiyawahi odubohi Yaubada a baha hi bahebaheya ona nugenugotuhuya ma ata Guyau Tu wiluyagohanita a baha tu wituwetuwegenah hi palipaliwelemi ona nugenugotuhuya.

³ Ma geka ginouli baneina ona nugenugotuhuya: Houga anani kokoe uyahina apo lawa Guyau a gunawilana hina paliguyoguyougeya po tauhi hinihi luhogalana hina wootagohi.

⁴ Ma hina ibaabani yabayababa, hina pa, ‘Guyau a paliwitumagana ipa apo ina nei. Tamogi apo ina nei, bo eega? Tauna meka? Odubona hipuli a wawala hougana ma i nei po amalai ega ginouli gehouna ita buiya. Lolowa googata hilahilagehi hai houga uyahina ma i nenei ginouli atapuhi galenahi emoemotahi.’

⁵ Tauhi hi luhogaleya ipa bahana hina winugoguluwi po ega hina noonoli naka odubona Yaubada a baha uyahinei yada ma hipuli hi wawala. Ma gasi Yaubada hipuli i liyawali boga uyahinei.

⁶ Ma boga hipuli tupo wohepali i wiapapoeya Nowa a houga uyahina.

⁷ Yaubada a baha uyahinei hipuli ma yada i houna imahiyehi po he iotonana, ma libahibahi iyetana uyahina apo ina apu halehi po tu apapoe ina liyababahi.

⁸ U lawa, ginouli emosi hota ega nugomi ina gulguluwi, iyeta emosi Guyau uyahina mei bolima

magouhi tausana, ma bolima magouhi tausana
uyahina mei iyeta emosi.

⁹ Tamogi lawa gehouhi hai winugonugotuhu
powa hi pa, ‘Guyau a bahapiko nugona ita gu-
luwihi po apegia ina dewahi.’ Ega ita ihinihinibiga
ma tamogi i’mtaibagabagi ma e iotonaneta ipa
ataputa ta nugobui po ega gehouna ina hahaleya.

¹⁰ Apo yohola Guyau a libahibahi iyetana ina
nei ma a neina galenana mei tu danene po yada gi-
noulihi hina yababa dagugu baneina uyahinei po
hipuli uyahina ginouli atapuhi he memae ina ala
pahihi po hina yababa mayau alalatana uyahinei.

¹¹ Apo ginouli magomagouhi yada ma hipuli
uyahihihina yababa, uyahinei tauta tu mae hipuli
geka uyahina ta wiwoiyawena meta po ta pali-
halena meta Yaubada uyahina.

¹² Ma ta galena gae po Guyau a houga nei
iyetana ta galeya, babana Yaubada apo yada po
ginouli atapuhi ina liyababahi mayau ebegalanei.

¹³ Ma tauta apo tana iotonana yada ma hip-
uli wouhi ubeihi po ta galehi, babana Yaubada
amaka i paliwitumaganeya uyahita tupo noka
binei, dobuna dewa dumadumaluna uyahina e
memae.

¹⁴ U lawa, omi wiotonana hougana Keliso
binei ona wileta kadidili po a nugodumolami
ona memae dewa dumadumaluna ma yeuyeuna
uyahina Guyau u matana.

¹⁵ Ma ona hanapugena dumaya ata Guyau
i’mtaibagibagi ubeita ipa ta luyagohana. Naka
binei ma tulata Paulo i’mgiluma uyahita po ipa
ta hanapugeya, babana tauna a galena tuhaga
Yaubada uyahinei i waya,

¹⁶ po ginouli geka binei amaka i paliweleta a leta atapuhi uyahih. Ma a leta gehouhi u hinehi naka ginouli gehouhi hi wipilipili, uyahinei tu winugoneina po tu lunugoluwaluwaga a gilumahi u hinehi ginouli gehouhi hi galena buinihi po gasi Yaubada a Buka gehouhi yaka tunawahi hi wiapapoe mehi.

¹⁷ U lawa, ginouli geka taumi amaka o hanapugehi, yaka ona galena itete memi meka po apo tu wiponahahalena hina tanitaniwagemi po omi towolo momota uyahinei apo ona peu.

¹⁸ Ma ata Guyau Yesu Keliso tauna Tu wiluyago-hanita a lunugotootogo ma hanapuna uyahimi ina lata po tauna ta wootalagiyeya ina nae po ega sigana. Moina.

**YAUBADA A WOGATALA WOUNA
The New Testament in the Tawala language of Papua
New Guinea**

Nupela Testamen long tokples Tawala long Niugini

copyright © 1985, 2014 Wycliffe Bible Translators, Inc. and Bible Society of Papua New Guinea

Language: Tawala

Translation by: Wycliffe Bible Translators

Text © 1985, 2014 Wycliffe Bible Translators, Inc.; 2014 print edition © Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 28 Dec 2024 from source files
dated 31 Aug 2023

03dd8e7f-64f4-5464-abd5-5e08202f0f29